

खबरां

1. बजट सत्र दा पैहला चरण समाप्त, त्रै हफ्तें दे अवकाश दे बाद संसद दे दौनें सदन अगले म्हीने दी 9 तरीक गी दुए चरण लेई फ्ही किट्टे होइना।
2. प्रधानमंत्री नरेंद्र मोदी होरें अज्ज संज्ञा नमीं दिल्ली च प्रधानमंत्री कार्यालय दी नमी ईमारत ते 2 होरनें सरकारी भवनें आहले सेवा तीर्थ दा उद्घाटन कीता।
3. संसदीय चुनावं च भारी जित्त दे बाद बांगलादेश राश्ट्रव्यापी पार्टी अगली सरकार बनाने लेई तैयार।
4. प्रधानमंत्री नरेंद्र मोदी होरें बीएनपी प्रमुख तारिक रहमान हुंदी पार्टी दी निर्णायक जित्त पर बधाई दिती, आखेआ भारत लोकतांत्रिक बवस्था ते समावेशी बांगलादेश दा समर्थन करने लेई प्रतिबद्ध ऐ।
5. विश्व रेडियो दिवस दे मौके पर अज्ज छत्तीसगढ़ दी राजधानी रायपुर च आकाशवाणी ते यूनेस्को आसेआ संयुक्त रूपै नै राश्ट्री सतह दे इक विशेष कार्यक्रम दा आयोजन कीता जा'रदा ऐ।
6. महिला एशिया कप राइजिंग स्टार टी-20 क्रिकेट च भारती टीम ए बैंकाक च यू.ए.ई खलाफ गुप चरण दे मकाबले थमां अपने अभियान दी शुरूआत करोग।

<><><><><><>

Parliament Adjourned

बजट सत्र दा पैहला चरण अज्ज समाप्त होई गेआ। संसद दे दौनें सदन त्रै हफ्तें दे अवकाश दे बाद अगले म्हीने दी 9 तरीक गी दुए चरण लेई फ्ही लगइना। सत्र दा पैहला हिस्सा पिछले म्हीने दी 28 तरीक गी राश्ट्रपति द्रौपदी मुर्मू हुंदे दौनें सदन दे संयुक्त संबोधन कन्नै शुरू होआ हा। दुआ चरण 2 अप्रैल तोड़ी चलोग। लोकसभा च सत्र दे पैहले चरण दे अखीरी दिन दपैहरी 12 बजे स्थगन दे बाद जिसलै सदन दी बैठक होई तां कई मंत्रियें अपने मंत्रालय कन्नै सरबन्धित दस्तावेज पेश कीते। एह्दे बाद पीठासीन अधिकारी संध्या राय होरें सदन गी अगले म्हीने फ्ही शुरू होनेई लेई स्थगित करी दित्ता। एह्दे कोला पैहले सदन दी कार्यवाही शुरू होंदे गै पीठासीन अधिकारी संध्या राय होरें प्रश्नकाल शुरू कीता जेदे च केंद्री स्वास्थ्य मंत्री जे.पी नड्डा होरें कोडीनयुक्त कफ सिरप दे सेवन कन्नै होने आहली मौतें कन्नै सरबन्धित इक सुआल दा परता दित्ता। नड्डा होरें आखेआ जे देश च कोडीनयुक्त कफ सिरप दे सेवन कन्नै कुसै दी मौत दी सूचना नेई थ्होई ऐ। उनें आखेआउ जे जिसले बी कुसै दवा कन्नै सरबन्धित मौत दा कोई मामला सामने आंदा ऐ, सरकार तुरत जांच दा आदेश दिंदी ऐ। उनें आखेआ जे कोई दवा मानव उपभोग लेई अनुपयुक्त पाई जंदी ऐ तां उसी तुरत बजार थमां वापस मंगाई लैता जंदा ऐ। हालांकि विपक्ष दे हंगामे करी नड्डा हारें अपना उत्तर पूरा नेई करी सके। कांग्रेस, टीएमसी ते डीएमके सने होरनें दलें दे सदस्यें सदन दे वेल च आई गए ते नारेबाजी शुरू करी दित्ती। विरोध जारी रौहने पर सदन गी दपैहरी 12 बजे तोड़ी लेई स्थगित करी दित्ता गेआं राज्यसभा च बजट सत्र दे पैहले चरण दे अखीरी दिनें अज्ज शून्यकाल ते प्रश्नकाल दौनें दी कार्यवाही सुचारू ढंगै नै सम्पन्न होई। उच्च सदन च प्रश्नकाल दरान पूरक सवालें दा परता दिंदे होई कृषि ते करसान कल्याण मंत्री शिवराज सिंह चौहान होरें आखेआ जे प्रधानमंत्री नरेंद्र मोदी हुंदे नेतृत्व च देशभरै दे करसाने दी हर समस्या दे हल लेई लगातार प्रयास कीते जा'रदे ना। उनें आखेआ जे सरकार नै करसाने दी परेशानी उपज दे सुरक्षित भंडारन गी यकीनी करने लेई कृषि अवसंरचना कोष दा गठन कीता ऐ। बाद च उच्च सदन गी अगले म्हीने फ्ही शुरू होने लेई स्थगित करी दित्ता गेआ ऐ।

<><><><><><>

Seva-Terath

प्रधानमंत्री नरेंद्र मोदी होरें अज्ज संज्ञा नमीं दिल्ली च सेवा तीर्थ दा उद्घाटन कीता जेदे च प्रधानमंत्री कार्यालय दी नमीं ईमारत ते दो होरनें सरकारी भवन, कर्तव्य भवन-1 ते 2 शामिल ना। श्री मोदी होरें अज्ज दपैहरी इस भवन दे नामकरण दा बी अनावरण कीता। प्रधानमंत्री कार्यालय अज्ज थमां राश्ट्री राजधानी च सेवा तीर्थ नामक नमें भवन परिसर थमां कम्म करना शुरू करी देइना। सेवा तीर्थ च हुन प्रधानमंत्री कार्यालय, राश्ट्री सुरक्षा परिषद सचिवालय ते कैबिनेट सचिवालय स्थित न जेडे पैहले बक्ख-बक्ख स्थानें पर हे।

<><><><><><>

BNP-Bangladesh poll

अध्यक्ष तारिक रहमान हुंदा नेतृत्व आहली बांगलादेश राष्ट्रव्यापी पारी नै 13में आम चुनाव च बहुमत दा आंकड़ा पार करदे होई देश च अगली सरकार बनाने दी तैयारी करी लैती ऐ। हुन तोड़ी घोशित नतीजें दे मताबक बी.एन.बी ते औहदे सहयोगी दल 208 चुनावी खेत्तरें च अगगे चला'रदे न जेड़े 300 सीटें आहली जातीय संसद च साधारण बहुमत लेई जरूरी 151 सीटें दे आंकड़े गी पार करी चुके दा ऐ। कल 299 चुनावी खेत्तरें च मतदान होआ हा। इक संसदीय मेदवार दे निधन करी इक निर्वाचन खेत्तर च मतदान स्थगित करी दित्ता गेआ हा। बांगलादेश च नमीं सरकार दे चुनाव दे कन्नै जनता नै जुलाई चार्टर तैहत प्रस्तावित संवैधानिक ते संस्थागत सुधारें पर बी मतदान कीता। हुनै तोड़ी घोशित 284 चुनावी खेत्तरें चा बीएनपी ते ओदे सहयोगी दल अगगे चला'रदे न जेड़े कोई 2 दाहकें थमां सत्ता थमां बाहर रौहने दे बाद निर्णायक जनादेश दा संकेत ऐ।

<><><><><><>

BNP Bangladesh Poll-2

प्रधानमंत्री नरेंद्र मोदी होंरें तारिक रहमान गी बधाई दिंदे होई आखेआ जे एहू जित्त उन्दे नेतृत्व च बांगलादेशी जनता दे विश्वास गी दर्शादी ऐ ते इक लोकतांत्रिक प्रगतिशील ते समावेशी बांगलादेश लेई भारत दे समर्थन दी पुष्टि कीती।

<><><><><><>

Rijju-LoP

संसदीय कार्य मंत्री किरन रिजजू होंरें आखेआ जे विपक्ष दे नेता राहुल गांधी हुंदा खलाफ निशिकांत दुबे आसेआ आहूंदे गेदे मूल प्रस्ताव पर अध्यक्ष कन्नै चर्चा दे बाद अगगे दी कार्रवाई तय कीती जाहग ते इसी विशेषाधिकार समिति या अचार समिति गी भेजेआ जाहग जां सिद्धे सदन च चर्चा लेई आहनेआ जा। श्री रिजजू होंरें संवाददाताएं कन्नै गल्लबात करदे होई आखेआ जे श्री निशिकांत दुबे आसेआ लाए गेदे मूल प्रस्ताव दे बाद सरकार नै फिलहाल विपक्ष दे नेता राहुल गांधी हुंदा खलाफ प्रस्तावित प्रस्ताव गी सदन च नेई आहने दा ऐ। उनें आखेआ जे संसदीय नियमें तैहत कोई बी सांसद प्रस्ताव आहनी सकदे न।

<><><><><><>

BIRAC

विज्ञान ते प्रौद्योगिकी मंत्री डॉ. जितेंद्र सिंह होंरें नमीं दिल्ली च जैव प्रौद्योगिकी ते सरबन्धित खेत्तरें लेई अनुसंधान, विकास ते नवाचार कोष- BIRAC दा शुभारम्भ कीता। इस कोष दा मकसद राष्ट्री प्रभाव लेई गहन तकनीकी नवाचारें ते स्वदेशी विनिर्माण गी बढ़ावा देना ऐ। इस मौके पर डॉ. सिंह होंरें आखेआ जे पिछले 10 ब'रे च जैव अर्थबवस्था च उल्लेखनीय वृद्धि होई ऐ जेड़ा 2014 च 8 अरब डालर ही। श्री सिंह होंरें आखेआ जे स्टार्टअप दी संख्या बढ़ियै अज्ज कोई 11 ज्हार होई गई ऐ।

<><><><><><>

Prez. Develop Nation

राष्ट्रपति द्रौपदी मुर्म होंरें आखेआ जे इक विकसित राष्ट्र दे निर्माण लेई ना शड़ा राजनीतिक स्थिरता ते मजबूत अर्थबवस्था दी जरूरत ऐ बल्कि सोआस्थ, शिक्षित ते जिम्मेदार नागरिकें दी बी जरूरत ऐ। नमीं दिल्ली च सशक्त भारत लेई कर्मयोग पर राष्ट्रव्यापी अभियान गी संबोधित करदे होई राष्ट्रपति होंरें आखेआ जे जनता दी सक्रिय भागीदारी दे विजन कुसै बी राष्ट्री लक्ष्य गी हासल करना कठन ऐ। राष्ट्रपति होंरें नागरिकें थमां नतीजें दी चैंता कीते विजन ईमानदारी ते समर्पण कन्नै कम्म करने पर ध्यान केंद्रित करने दी गुजारशत कीती।

<><><><><><>

Conclave

विश्व रेडियो दिवस दे मौके पर अज्ज छत्तीसगढ़ दी राजधानी रायपुर च आकाशवाणी ते यूनेस्को आसेआ संयुक्त रूपै नै राष्ट्री सतह दे इक विशेष कार्यक्रम दा आयोजन कीता जा'रदा ऐ। इस कार्यक्रम दा शुभारम्भ राज्य दे मुख्मन्त्री विष्णु देव साई होंरें कीता। इस बरे विश्व रेडियो दिवस दी थीम रेडियो ते आर्टिफिशल इंटेलीजेंस ऐ। कार्यक्रम गी संबोधित करदे होई मुख्मन्त्री होंरें आखेआ जे आकाशवाणी सूचना, शिक्षा ते सोआस्थ मनोरंजन देने दा इक सशक्त माध्यम ऐ। आकाशवाणी दे महानिदेशक राजीव जैन, यूनेस्को दे संचार ते सूचना क्षेत्र दे क्षेत्रीय सलाहकार हजाज माले, कई जन प्रतिनिधि, पदनश्री पुरस्कार विजेता ते बक्ख-बक्ख क्षेत्रें दे विशेषा इस कार्यक्रम

च उपस्थित हे। उपराष्ट्रपति सी.पी राधाकृष्णन ते प्रधानमंत्री नरेंद्र मोदी होंरें इस मौके पर शुभकामनां दित्तियां न। एह दिवस हर बरे 13 फरवरी गी संयुक्त राष्ट्र रेडियो दी स्थापना 1946 दे चेते च मनाया जंदा ऐ।

<><><><><><>

Agri-US Deal

कृषि क्षेत्र नै भारत ते अमरीका बश्कार अंतरिम बपार समझौते दा सोआगत कीता ऐ। आकाशवाणी समाचार कन्नै विशेष गल्लबात च नेशनल कमोडिटी एंड डैरीवेटिक्स एक्सचेंज लिमिटेड दे प्रबंध निदेशक डॉ. अरूण रास्ते होंरें आखेआ जे लौहके करसानें दे हितें दी रक्षा लेई कनक, चौर, दुध ते मुर्गी पालन जनेई कृषि चीजें गी समझौते शा बाहर रक्खेआ गेआ ऐ।

<><><><><><>

Giriraj-Opposition

कपडा मंत्री गिरिराज सिंह होंरें भारत-अमरीका अंतरिम बपार समझौते गी लेइयै जनता च भ्रम फैलाने लेई विपक्षी दलें दी आलोचना कीती। संसद दे बाहर पत्रकारें कन्नै गल्लबात करदे होई श्री सिंह होंरें शिवराज सिंह चौहान ते वाणिज्य मंत्री पीयूष गoyal होंरें साफ कीता ऐ जे करसानें दे हितें दी अनदिक्खी नेई कीती जाहगा।

<><><><><><>

Rising Star T-20 Cricket

महिला एशिया कप राइजिंग स्टार्स टी-20 क्रिकेट च मौजूदा चैंपियन भारती टीम ए नै थाईलैंड दे बैंकाक च यू.ए.ई खलाफ ग्रुप स्टेज दे पैहले मैच च अपना अभियान शुरू कीता। भारती टीम ए नै 131 रन दे लक्ष्य रक्खेआ ऐ। पैहले बल्लेबाजी करदे होई भारती टीम ए नै निर्धारित 20 ओवरें च 9 विकेटें दे नुकसान पर 130 रन बनाए। पैहले मैच च पाकिस्तान नै नेपाल महिला टीम गी 30 रन कन्नै हराया।

<><><><><><>

Assembly Off Day

जम्मू-कश्मीर विधानसभा सचिवालय नै घोषणा कीती ऐ जे सोमवारें 16 फरवरी गी सदन दी कारवाई नेई होग। एह फैसला सभनें दी सहमती कन्नै लैता गया ऐ। विधानसभा सचिवालय आसेया जारी Bulletin मूजब 16 फरवरी गी जेडे कम्म तय हे- हुन ओह 20 फरवरी गी शक्रवारें होगंन।

<><><><><><>

Army Commander Security Review

सेना दी उत्तरी कमान दे प्रमुख लेफ्टिनेंट जनरल प्रतीक शर्मा होंरें उधमपुर जिले च इक सांझी बैठक च आतंकवाद रोधी ढांचे गी तगड़ा बनाने दे मकसद कन्नै कीते गेदे सुरक्षा उपाएं दी समीक्षा कीती ऐ। आकाशवाणी जम्मू संवाददाता दी रिपोर्ट मूजब सेना दे कमांडर होंरें कल वर्चुअल तरीके राहें नियंत्रण केंद्रें दी सांझी हफ्तावार बैठक दी अध्यक्षता बी कीती ही। इस बैठक च सेना दे वरिष्ठ अधिकारियें दे अलावा पुलस ते सी.आर.पी.एफ दे सीनियर एहलकारें ते जम्मू ते श्रीनगर दौनें खित्तें थमां होंरें सरबंधत धड़ें बी हिस्सा लैता। इस दरान कुसै बी घटना थमां निब्वडने आस्तै पूरी चाल्ली तैयार रौहने, खुफिया जानकारी सांझी करने, एजेंसिएं दे आपूंच तालमेल च सुधार करने ते आतंकवाद रोधी ढांचे गी होर मजबूत करने पर चर्चा कीती गेई।

<><><><><><>

JK Govt.

जम्मू-कश्मीर च ओषधी ते सुगंधित बूहटे लाने गी बढावा देने दी महत्वपूर्ण गैंड च सरकार नै समेंबद्द योजना बनाने लेई उच्चे स्तर दी इक बैठक रक्खी। आकाशवाणी जम्मू दे संवाददाता हुंदी रिपोर्ट मुजब कल सामान्य प्रशासन विभाग जी.ए.डी दे राएं दित्ते गेदे सरकारी आदेश दे मुताबक जम्मू-कश्मीर च सुगंधित ते औषधीय बूहटे लौआने दी प्रक्रिया गी बढावा देने लेई कमेटी बनाने आस्तै आखेआ गेदा ऐ ते इस कमेटी दे चेयरमैन राई-बाई उत्पादन विभाग दे प्रशासनिक सचिव होर होडन।

<><><><><><>